

19. november 2013

UKA 2013/139
Finn Karlsen

Qaffasissunik atorfillit suliunnaarsitaangaangamik imal. soraarsitaangaangamik (Gyldne håndtryk) aningaasarpassuarnik pissarsisinneqartarnerata nunatsinnut naleqqutinngittup allangortinneqarnissaa siunertaralugu oqallinnissamik siunnersuut.

(Inatsisartunut ilaasortaq Randi Broberg, Partii Inuit)

Inatsisartunut Ilaasortap Randi Broberg Partii Inuit-niit siunnersuut saqqummiunneqartoq tunngaviatigut isumaqatiginartoq Siumumiit oqaatigissavarput.

Kisiannili qaffasissumik ilinniagaqartunik atorfinititsiniartarnermi tunngavigineqartarpoq atorfinititsinissamik aningaasarsiaqartitsinissamik soraanerussutisiat, atorfeqarnermi atugassarititaasut isumaqatiginninniartarnek, tamanna atorfinititsisussat atorfininniartullu akornanni pisartut politikikkut akuleruffissaangitsoq.

Siumumiit isumaqanngilagut maani Inatsisartuniit akuleruffigisassagippat atorfinititsiniarnermut aningasarsianut atugassarititaasunut allanullu ajunngitsorsiassanut tunngasut. Tamanna atorfinititsisartut isumaqatiginninniartarnek aqutugalugu isumagissagaat Siumumit isumaqarpugut.

Siumumiit pingaartutut isigaarput nunatta ilinniarluarsimasunit suliffigissallugu kaju-ngernartuunissaa, tamatumani sulinermi suliunnaarnermilu atugassarititaasut eqqarsaatigalugit periarfissat pitsaasuusariaqarneranik.

Siunnersuuteqartup tunngavilersuutai soorunami assortoruminaapput innuttaasut ilaat inuuniarnermikkut ilungersornerannik oqarnek, taaneqartut atugarissaarnerulernissaat Siumup maanna Naalakkersuisuutitaqalernermini eqqumaffigalugit pitsaanerusumik atugaqalernissaat sulissutigivaa.

Siumumilu isumaqarpugut Namminersorlutik Oqartussat suliffeqarfiutaanni akissaasersuisarnek Inatsisartunit akuleruffissaangitsoq, pissutigalugu suliffeqarfiit assigiinngitsut siulersuisut aalajangigaannik pisortassanik aalajangersaasarput taakkulu isumaqatiginninniartarnek tunngaviaglaugu akissarsialersuisarlutillu ajunngitsorsiassaqaqartitsinissaq isumagisarpaat isumagisassaralugulu, aammalu kattuffeqarnerup avaqukkuminaannera Siumumiit oqaatigissavarput.

Oqallisissatulli siunnersuutip tunngavia isumaqatiginanngitsuungilaq kisiannili oqareernitsituut tamanna Inatsisartunit akuleruffigineqarsinnaangilaq. Tamanna siulersuisoqarnikkut aammalu kattuffeqarnikkut isumagineqartussaammat.

Inuillu atugaat pineqarpata tamanna Inatsisartunit Naalakkersuisut aqutugalugit atugarisaarnerulersitsiniarneq politikkikkut isumagisassarigatsigu Siumumit erseqqissassavarput, taamatut innuttasut atugaqarnerat maanna Naalakkersuisut pitsanngorsaanissamik pimoorussillutik suliaqarnerat Siumumiit suleqataafigisarput isumalluarfigaarput.

Taamatut naatsumik Inatsisartunut Ilaasortap Randi Broberg Partii Inuit-niit oqallisissiatut siunnersuutaa Siumumiit oqaaseqarfigaarput.